

Ciamó n pinsier por la festa Dles Antlés: Pro la multiplicaziun di pans y di pësc tl vangele da incò, èl Gejú che invièia la jënt da se senté adòm. San Paul nes recorda ch'i formun un n corp, le corp de Gejú Crist, che é la Dlijia.

Por se senté adòm tl Spirit de Gejú sciöche mēmbri de so corp, n'él nia ma debojēgn ch'i partiunse cun chi che é tla meseria, mo ince ch'i se gnunse y junse a öna cun chi incēr nos ia y ch'i formunse comunité.

Da jí la domēnia a mēssa a festejé l'eucaristia orunse se recordé ch'i ne jun nia ma por nos instēsc, mo ch'i jun düc adòm a formé le corp de Crist, ch'al sciafies da ester vi tla comunité y te vignun de sü mēmbri.

SAN MARTIN

Da 30 agn incá fej Rita Rubatscher Verginer le sorvisc da mone cun gran lezitēza. Por ne perié nia do aiüt por laurs de fadia èl gonot so om y sü mituns che daidâ. I orun reconēsce chēsc sorvisc en la festa dl Cör de Gejú tla mēssa y dedô pro n buffet ia tl salf di Stödafüch. **Al vëgn perié la jënt da porté val' da mangé por le buffet.**

Al vëgn perié do le **contribut por la cōra**. Le contribut é de 40 euro por vignun che à compli 18 agn, tué fora i studēnc. I contribué é da paié ite tla banca o online banking: IBAN: IT 11 J 08010 58830 000304004922. Na copia di cunc é sön scafa di libri.

LUNGIARÜ

En lönesc, ai 30 de ma, vëgnel **lavé la dljia da Lungiarü**; al vëgn dër bel perié do tröpes mans arjignades da daidé (al gnará ince dui èi a sposté les proches).

En lönesc, ai 30 de ma, dales 20.00 **tignará siur Markus Moling n referat** „La fede te nosc Signur Gejú Crist, Fi de Dî“ tl salf dl paisc a Lungiarü. I sēis düc bel inviâ.

Al vëgn dër bel perié do le **contribut por la ploania** de 20 euro por porsona, tuc fora i studēnc, che vëgn trat ite les domēnies ai 5 y ai 12 de jügn do mēssa te calonia.

Racoiüda dl **refodam da tosser a S. Martin** en lönesc ai 6 de jügn dales 10.00-11.00.

La Scora de Musiga invièia düc dër bel al **concert de contlujun a Al Plan** en lönesc ai **6 de jügn** dales **18.00** tl salf dles manifestaziuns.

Le Zenter Families Mareo tēgn n **curs de acquagym cun Marta** Willeit por 10 iadi tl Hotel Teresa (1° curs: 19.15-20.15; 2° curs: 20.15-21.15) dai 02/06 ai 04/08 cun almanco 10 porsones por unité. Le cost é de 90 € por mēmbri dl ZFM y 110 € por i atri. Prenotaziuns pro Marta Willeit 339 73 84 558 cina al 01 de jügn, da paié ite söl cunt Zēter Families Mareo IBAN: IT 67 S 08010 58550 000305024064

La Uniun dles Patrones dl comun da S. Martin y la Uniun di Pairs tēgn por sües families na **griliada ite dal lech** a Lungiarü ai 12 de jügn. I fajun na buna marēna y stun dedô en compagnia. Da bur tēmp n'él nia. Prenotaziuns pro Sara 340 29 66 126

Döt le bun a chi che complēsc i agn de jügn

a San Martin: Angelina Tolpeit che nen complēsc ai 90 ai 9
Ida Dariz che nen complēsc 96 ai 11
Lois Clara che nen complēsc 81 ai 15
Pire Erlacher che nen complēsc 82 ai 15
Hermann Burchia che nen complēsc 92 ai 30

a Lungiarü: Doro Clara dl Toch che nen complēsc 81 ai 10
Monica Clara-Mischi che nen complēsc 85 ai 13
Flavia Costa Clara che nen complēsc 98 ai 15



www.unitepastorala.org

Plata dles Ploanies San Martin y Lungiarü

siur **Iaco Ploner** 333 48 32 765 / 0474 453 003 - ploner.jakob@aruba.it
redaziun: anton.gasser@rolmail.net - 348 27 44 517 / 0474 523 194

29.05. - 05.06.16 nr. 27

termo da publiché: jöbia 20.00

radio: 90,40 / 93,70

FESTA DLES ANTLÉS

Vangele do San Lūca 9.11b-17

Gejú ti â respognü ai apostui: Dedi os val' da mangé!

Ai à dit: I n'ùn nia, ater co cin' pans y dui pësc;

i messésson naöta jì nos instēsc a ti cumpré da mangé a döta chēsta jënt.

Al ê incēr cin' mile èi.

Al ti â respognü a sü discepu: Dijedi,

ch'ai dess se senté adòm te gröms da cincanta.

I discepu à fat ci ch'al ti à dit,

y à ciarè che düc se sentass.


Gejü deperpo à tut i cin' pans y i dui pësc,

à ciarè sö a cil, i à benedì y i à rumpì;

spo ti ai àl dè ai discepu,

ch'ai i partiss fora ala jënt.

Y düc à mangé y é gnüs pasciüs.



Püces ores dan süa mort crödia pēssa Gejú a sü discepu y a nos.

Al fej testamēt y nes lascia indô süa arpejun, por ch'ara vaís bun inant cun nos.

Bele cun so nadé n'orô Gejú nia d'ater co se mēte en contat cun nos,

insciö èl chersciü sö te na familia y á fat le zumpradü.

Al ne pisimâ nia da se dé jö cun amarâ y descreditâ se rovinan so inom.

Te so amur èl jü consecuēt inant cina ala mort söla crusc.

Gejú vá inant por so tru ince incö: Chēsc nes mostrel tl sacramēt dl'eucaristia.

Al ó ester sciöche pan: normal y scēmpl, nudriēt y efiziēt,

nēt nia atramēnter y avisa sciöche l'amur.

Gejú n'ó ester nia d'ater co pan, che é chiló por gní mangé.

Pormó canch'al vëgn ciaugné vál ite te nosta cern y te nosc sanch

y nes dá forza nöia. Tan dassēnn ó ince Gejú Crist s'uní cun nos.

La comuniun é n'incuntada y n'unité dër sota cun èl. So tru vá ite te nosc cör.

Le mister dl'eucaristia ó nes dé na gran contentēza.

Sc'i fossun pö bugn da tó sö chēsta scincunda y da se tó dlaurela,

da sté y ponsé do plü dī y capí che Idí nes scinca süa vita.

	SAN MARTIN		LUNGIARÜ
29.05.16 FESTA DLES ANTLÉS	9.00 Corona de ma 9.30 Mëssa solëna dla comunité cun prozesciun eucaristica 19.30 Corona de ma sö Ju	29.05.16 Domënia	7.40 Adoraziun, pröma pert 8.00 Mëssa solëna dla comunité cun un n vangele dedô te dlijia dedô Adoraziun, secunda pert 14.00 I jun por le Tru di Crisé dala dlijia demez
30.05.16 Lönesc Otto Neururer, Ferdinand	19.30 Corona de ma a Picolin	30.05.16 Lönesc	Al vëgn lavé la dlijia – präibel gnide a daidé 20.00 Referat de siur Markus Moling sura le fede te Gejú Crist, Fi de Dî
31.05.16 Dedolönesc Petronila, Aldo	19.30 Corona de ma a San Martin	31.05.16 Mertesc	20.00 Corona de ma dala Grota
dal dedolönesc al vëndres é le ploan siur Iaco demez – a provede jarál pormó l’edema do Les Antlés			
01.06.16 Dedemesaledema Justin, Scimun		01.06.16 Mercui	
02.06.16 Jöbia Marzelin y Pire		02.06.16 Jöbia	
03.06.16 Vëndres Cör de Gejú	18.30 Ora d’adoraziun al Cör de Gejú	03.06.16 Vëndres	7.30 Adoraziun al Cör de Gejú (Grup liturgich)
04.06.16 Sabeda Cör de Maria	14.00 Noza de Davide Moling y Elis Sottara 15.30 Mëssa tla Ciasa de Palsa 18.30 Mëssa prefestia fam. Leo Crepaz fam. Flöss, Anví + Bino Pedevilla	04.06.16 Sabeda	20.00 Mëssa prefestia + + Vantsch + Casper Clara de rengraziamënt a Santa Rita da Cascia
05.06.16 FESTA DL CÖR DE GEJÚ	8.00 Mëssa solëna dla comunité cun un n vangele dedô te dlijia 19.00–20.00 Adoraziun al Cör de Gejú	05.06.16 Domënia	9.30 Mëssa solëna dla comunité cun prozesciun eucaristica 15.00 Corona tla capela da Seres